

Kangiani, Kalaallit Nunaatalu sineriaani meeqqat ikiorneqarnissaat tunngavigalugu Naalakkersuisut Danskit Naalagaffiannut ikioqqullutik saaffiginnissuteqassasut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Partii Naleraq, Demokraatit, Atassut, Suleqatigiisitsisut aamma Inuit Ataqatigiit)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalaakkersuisoq)

Aappassaaneerneqarnera

Ilaqutariinnermut Peqqissutsimullu Ataatsimiititaliamit isumaliutissiisummut Naalakkersuisut matumuuna qujapput.

Ilaqutariinnermut Peqqissutsimullu Ataatsimiititaliap isumaliutissiisummini maluginiarpa pisariaqartillugu toqqaannartumik meeqqanut ikiorsiisoqassasoq, aammali meeqqat ikiorneqarnissamik tapersorneqarnissamillu pisariaqartitsinerinut pissutsit tunuliaqutaasartut eqqumaffigineqartut. Taamaalilluni pissutsit tunuliaqutaasut suliarineqaqqaartinnagit ikiorsiineq taamaallaat ersiutaasartunik katsorsaanerinnaassanngitsoq anguniarneqarpoq.

Taamatuttaaq suliaqaqqinnissami suliniutigineqartussanilu piffissaq qaninnerusoq ungasinnerusorlu eqqarsaatigineqassasut maluginiarneqarpoq. Ikiorsiineq tapersersuinerlu ataatsimiititaliaq malillugu Kalaallit Nunaanni kommunit Naalakkersuisullu kiisalu naalagaaffimmi oqartussaasut akornanni patajaatsumik kinguneqarluartumillu suleqatigiinnermik aallaaveqartariaqarpoq. Pissutsinut naleqquttumik toraagalimmillu ikiorsiinerup tapersersuinerullu saniatigut oqartussaasoqarfiit assigiinngitsunik suliallit akornanni tamakkiisumik isiginnittumik eqqarsartoqassaaq, aammali ikiorsiinerup tapersersuinerullu qitiusumi, nunap ilaani aalajangersimasumi piffinnilu attatiinnarneqarnissaa qulakkeerneqassalluni.

Sumiginnaasarneq ajornartorsiutaammat assigiinngitsorpassuarnik katitigaasoq, piffissaq qaninnerusoq ungasinnerusorlu eqqarsaatigalugit aaqqiissuteqarnissamik piunasaqaateqartitsisoq ataatsimiititaliap isumaqataaffigimmagu Naalakkersuisut nuannaarutigaa. Taamatuttaaq meeqqanut ilaqutariinnullu ataatsimut isiginnilluni suliaqartoqarnissaanut tapersersuineq Naalakkersuisut nuannaarutigaa, taamaalilluni meeqqat pisariaqartitaat salliutinneqarniassammata. Aammattaaq ikiorsiineq pineqartoq annerusumik nammineq ikiorsinnaanissamat ikiuinertut isikkoqassammat Naalakkersuisut nuannaarutigaa, ima paasillugu ikiorsiineq tapersersuinerlu tunuliaqutigalugit pingaarnertut kalaallit oqartussaasui innuttaasunut attaveqartuusassaasut.

Siunnersuut manna tunuliaqutaralugu Naalakkersuisut meeqqat pillugit ikiorneqaqqullutik qallunaat naalagaaffiat attaveqarfigissavaat, soorlu aamma Naalakkersuisut qallunaat oqartussaasuunik massakut suleqateqarnertik ingerlatiinnassagaat. Qallunaat naalagaaffiannut saaffiginnissut pillugu kiisalu suleqatigiinnerup immikkullu ittumik suliniutit siumut ingerlanerat pillugit Ilaqutariinnermut Peqqissutsimullu Ataatsimiititaliaq Naalakkersuisut

ingerlaavartumik ilisimatitsiffigisassavaat. Qallunaat oqartussaasuisa ikiunnissamat aaqqiissutissanullu periarfissat ilanngussinnaasaat soorunami suliniutinut apeqqaassapput.

Taamatut oqaaseqarlutik allannguutissatut siunnersuut suli akuersaartumik Inatsisartuni suliarineqartussanngorlugu Naalakkersuisut tunniuppaat.